



Minggu, 15 Desember 2024

Ogen: Lukas 7:48



Dosana Ialemi



Sekalok pendantsen rusur kal iderpa "rasa bersalah." La si gejab mawen latih si akap, anak la bagi ukur senembas ernembahate man anak ras perbulangen, kedungenna erkadiola. Jenari i bas kinatana mbue diberu-diberu nggeluh i teruh "rasa bersalah" sabap la bagi sura-sura simetuna ia, ntah la banci mereken pupus i bas jabuna, ntah rusur anak sakit, si e tempa-tempa jadi kesalahen sekalok diberu kerina. Perasan tidak layak, la sempurna ras gagal jadi si ngisi ruang pusuh siarusna dem alu dame. Lebihen ka adi i bas si e kerina, ndabuh ka ku bas dosa ras kelepaken, lanai bo iangka uga nari rontangna pusuh e.

Diberu si perdosa si ngamburken minak ku nahe Tuhan Jesus, dengen ngandung bas naheNa, nuduhkan perasan bersalah si mbelin kal sedekah enda. La lit kai pe si banci ngapuli ras mpesalang pusuhna, e maka kencana iidahna Jesus, minak si meherga bas burana pe la iakapna mergasa lako iamburken man Tuhan Jesus, sabap tambar i bas perasan bersalah e, Dibata ngenca inganna. Sada kalimat saja i bas Tuhan Jesus nari, enggo cukup erbahanca ia ergegeh lawes jadi sekalok si mbaru, "dosandu enggo ialemi."

Perasaan bersalah e dosa. Sabap enggo si ukum banta, sementara ngukum ras ngadili e dahin Dibata. Perasaan bersalah adi si asuhi erbahanca lanai si idah kebaikan Tuhan i bas geluh enda. E maka adi lit rasa bersalah e i bas kita, baba ku Jesus, akuken man bana, IA ngelayasisa man banta. Ula andalken gegehta, alu erpenulak nandang i perasaan e, ndarami pelarian, ntah pe alu mpebelin-belinca bas ukurta. Tuhan Jesus la pernah nuntut kesempurnanta, iangkana kita lemah, terbatas. Adi reh kitab bana, ialo-alona kita. Akukenlah salahta, rehlah ku Jesus, jenari alemi ka kalak si ersalah man banta, nggeluhlah alu bebas arah tabanen rasa bersalah nari. Dosandu enggo ialemi, mulihlah.

Man kalak si ngakuken dosa, Dibata e setia ras adil